

Date – 16/07/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoman Mizoram sorkar hnuaia document dik lo hmanga Family Pension la mek te chu anmahni duh thu ngeia pekir turin a ngen.
2. Mihring hmanga sumdawnna do turin Oasis India chuan Sairang Railway Station-ah Human Trafficking Interception Project an rawn hawng.
3. Union Cabinet chuan cheng vaibelchhe nuai 1 sing 2 leh 500 senna tur Semicon 2.0 a pawm.
4. FIFA World Cup 2026 Semifinal inkhelah nizan khan Argentina chuan 2-1 in England an hneh.

<><><>

CM

Dan dik lova Family Pension laten an Pension Payment Order sorkara pe kir tura sorkar hmalakna neih mekah Chief Minister Pu Lalduhoma, Finance Minister chuan Mizoram sorkar hnuaia document dik lo hmanga Family Pension la mek te chu ngaihnhathiamna hun hawn chhunga anmahni duh thu ngeia pekir turin a ngen.

Chief Minister chuan, Family Pension hi mi eng emaw zatin dik lo takin an la nia hriat a ni a ti a. A then chuan tum reng vangin document lem hmangin an la nia a lan laiin mi tam tak chuan an hriat loh vangin an lo la an ni thei bawk a. Hetianga dik lo taka sorkar sum luan raltirna hi tihtawp an tum a ni a ti.

A bultan nan mahni duhthu ngeia PPO pekkirna hun, thla thum chhung an hawng mek a, document dik lo, dawt behchhana family pension laten anmahni duh thu ngeiin bansan se, hun hawn chhunga pe kirte chu an sum lo lak tawhte kn chhuh dawn lo va, an ngaidam dawn a ti.

Ngaihnhathiamna hun a ral hunah Task Force ten pension latute zawng zawng hi kal chilhin, a hmuna an endik dawn a. Dik lo taka pension la an hmuhchhuahte chu an tihtawpsak bakah hremna pek an tum a ti bawk.

Finance Department chuan dan dik lo va Family Pension laten an Pension Payment Order sorkara pe kir tura hmalakna bultanna nimin khan Aizawlah buatsaih a ni a, Chief Minister hian he hun hi a hmanpui a ni.

Sorkar chuan dik lo taka Family Pension latute tan mahni duhthu ngeia sorkara pekkir na hun July ni 1 atanga September ni 30 chhung a hawng mek a. Tunah hian Mizoram sorkar hnuaiah pension benefit dawngtu hi mi 39,954 an awm mek a, heng zingah hian superannuation pension la mek 22,139 leh Family pension la mek mi 11,194 an awm a. Pension chi dang latu Centralised Pension Processing Centre (CPPC) kal tlanga la mi 5,629, Voluntary 594, VRS 289, Invalid 69 leh Compulsory mi 40 te an awm a ni.

(DIPR)

<><><>

VAIRENGTE AYUSHMAN BHARAT

Sorkar laipuiin India khua leh tui kum 70 chin chunglam a thlawna damdawi ina inenkawl theihna a siam, Ayushman Bharat - Pradhan Mantri Jan Arogya Yojana (AB-PMJAY)-a inziahlulh dan chungchang nimin khan Vairengte Community Health centre thawktu ten an zir a,

AB-PMJAY hnuaiah hian kum 1-ah cheng nuai 5 man thleng a thlawnin inenkawl na a dawn theih a, Vairengte Community Health Centre (CHC) a thawktu Doctor te leh staff te chuan ni thum chhung hian Central scheme Digitalisation of Ayushman Bharat Healthcare Scheme an zirho dawn a ni.

Ayushman Bharat Healthcare scheme hnuaiah Ayushman Bharat Health Account (ABHA) hmanga mipui ten 14- digit digital Health ID siam dan te Digital Health Records hmanga damlo te chanchin chhinchhiah anih dan tur te leh Damlo te mai nilo Healthcare lama thawk Doctor leh nurse te in ziahlulh na tur registration tih dan tur te zir ho a ni ang.
Kan corr report ngaithla ang.

(Doreen, Vairengte PTC)

<><><>

HUMAN TRAFFICKING PROJECT

Mihring hmanga sumdawnna do turin Oasis India chuan Sairang Railway Station-ah Human Trafficking Interception Project nimin khan an rawn hawng a.

Sihhmui VCP Pu Lalthlenglina'n he project hi hawngin ram lian zawka thil thleng tura ngaih Mizoram chhunga ngeia a dona tur programme hawn a ngai ta chu hmalakna tha tak a nih rualin thil lungchhiatthlak tak nia a hriat thu a sawi a. Thawktute hmalakna chu khawtlangin a thlawp tlat dawn tih sawiin an tanpuina an mamawh a nih chuan inthlahrung miah loa hrilh thin turin a chah a ni.

Oasis India Executive Director Pu Mangneo Lhungdim chuan Oasis India chu London-ah kum 38 kaltaa tan a nih thu leh India ramah pawh kum 30 chhung a kal tawh thu a sawi a. A thawh ber chu mihring hmanga sumdawnna do leh hetiang tuartute chhanchhuah leh enkawl a ni a ti a, Inkalpawhna lama hmasawnna ruhrel lian hrang hrangte chu mihring hmanga sumdawnna thlenna hmun anih thin avangin inbuatsaih a pawimawh tih a sawi a. Kohhran, YMA, MHIP leh khawtlang mipuite thawhpuih a sawm a ni.

Sihhmui MHIP President Pi Laldawngliani chuan mihring hmanga sumdawnna chungchang chu Sairang rel chawlhmun an lo din tirh khan an ngaihtuahnaah a awm thu leh eng angin nge hma an lak ang tih an ngaihtuah ve thin thu leh tuna hmalakna chu an thlawp thu a sawi a ni. Sihhmui MHIP President chuan Sairang police te chu tlem an tih thu leh an indaihlo hle ni a an hmu thu sawiin Rel station-a duty turin sorkarin police dah belh thei se a duh thu a sawi a ni.

Sairang rel chawlhmunna Oasis India in Human Trafficking Interception Project an hawn hi hmarchhaka a pathumna a ni a. Kamakhya Railway Station leh Dimapur Railway Station-ah te an lo hawng tawh a. Hawnna inkhawmah hian Akashvani News Asst. Director Pu Gin Gangte, IIS bakah sawm bik mi thenkhatin thu an sawi bawh a ni.

(Corr)



NGOPA EMRS

Ministry of Parliamentary Affairs, New Delhi-in India ram puma Eklavya Model Residential School (EMRS) awmte tana National Youth Parliament Competition a buatsaih vawikhatnaah EMRS Ngopa-te chu Mizoram aiawha telin Zone I ah pakhatna an ni.

Youth Parliament hi Parliament rorel dan kalphung chan chhuahna niin, zirlaite tan mipui rorelna Democracy-te, ram rorel dante leh khawtlang inrelbawlna Chiang zawka an hriatna tura duan a ni. EMRS Ngopa te hi Zone-I intihsiaknaah pakhatna niin Zone hrang hranga pakhatna theuhte hi an intihsiak leh dawn a. India ram hi Zone thumah then a ni a, Zone I-a awmte hi Zone thumah then leh niin Mizoram hi kumin March thla khan NE region intihsiaknaah lawmman pakhatna an lo la tawh a, nimin khan East Region leh North West region-a pakhatna te hi EMRS Kumulung, West Tripura-ah inel lehin, heti hian EMRS Ngopa hian pakhatna dinhmun a hauh leh a. Zone pathum champion-te theuh inelna National level hmachhawn turin an kal dawn a ni.

Mizoram EMRS Society hnuaiah hian functional school sawmpakhat a awm a, zirlai sanghnih zariat sawmnga-pahnih an awm mek a ni. EMRS Ngopaah hian zirlai zathum leh pathum an awm mek a ni.

(DIPR)



LAWNGTLAI SUPPLY DEPT. REPORT

Lawngtlai District Civil Supply Officer Pu Lianchhuma Chinzah chuan Lawngtlai district kalpawhna kawngpui hun eng emaw chen ping mahse mipui mamawh hrang hrangah harsatna a awm lo tih a sawi.

Akashvani palaiin a kawmnaah he thu hi sawiin Pu Lianchhuma Chinzah chuan fur ruahsur vanga Mizoram hmundang atanga Lawngtlai District in chakkhai a lakluhna National Highway 02, Lawngtlai leh Aizawl inkar chu Lunglei District chhung, Bualte leh Tawipui South ah te hun engemawchen a pin hnu ah, Tuialhthei, Eirawngbawlina Gas leh Buhfai ah Lawngtlai District ah harsatna thleng a la awm lo tih a sawi a. Buhfai chu fur chhung daih tur chhekkhawh a nih bakah Lawngtlai a FCI Kudamah chhekkhawh sa a tam tawk tih a sawi a. Eirawngbawlina Gas pawh Bualte dai kawng ping a tlang rualin Trip engemawzat a rawn thleng tih sawiin harsatna a awm loh thu a sawi a. Tuialhthei lamah pawh chhekkhawhlsa a awm nual tih sawiin, Lawngtlai khawpui chhunga Filling Station ten Petrol leh Diesel chhekkhawhlsa an nei tam tawk rih a, mipui tan chiaina tur a awmlo tih a sawi a ni.

Report a a landanin Khawpui chhunga Filling Station te, Mizofed Filling Station ah Petrol Litres 20,000 Diesel Litre 30,000, Mavula Filling Station ah Petrol Litre 20,000 leh Diesel Litre 38,000 an nei a, F.Rothuama Filling Station ah Petrol Litres 10,000 leh Diesel Litres 40,000 nei mekin, B. Sangchem Filling Station in Petrol Litre 19,000 leh Diesel Litres 30,000 an nei mek a. Bungtlang South a Filling Station pahnih bakah Chawngte leh Sangau a Filling Station te pawn Tuialhthei chhekkhawhlsa an nei nual bawh a ni.



KHAWZAWL OIL SEEDS

Sorkar laipui hnuaia tel tharchhuah tihpunna tur National Mission on Edible Oils hnuaiah Khawzawl dist-a loneitu thenkhat chuan kum khat tla tel an herchhuak a.

Khawzawl District Agricultural Office chuan NMEO-Oil Seeds scheme hnuaiah kum 2025-26 chhung khan Khawzawl District ah Nihawi (Variety KBSH 90) a chintir a. Nihawi hi zau 7 - Rabung, Sialhawk, Biate, Khawzawl, Khawhai leh Kawlkulh, New Chalrangah te chin niin loneitu 54 in ram Hectare 50 vel a zau ah nihawi hi an ching a, DAO hmalaknain tel herna khawh ngaihtuah niin khawh hi hmun thum Khawzawl, Rabung leh Sialhawk-ah te bun a ni a, tel 2000 litre her chhuah a ni a, zaa 99.9 a fir a ni.

Khawzawl District Agriculture Officer Pi Lallawmzuali chuan tun dinhmunah Khawzawl District-a NMEO-Oil seeds in a tum ber chu loneitute Tela an lo intodelh leh tel hrisel tak an ei theih a ni a ti a, kumina tel her chhuah atang pawh hian loneitu tam zawh chuan a kum khat tla hi an thar tawh thu a sawi.

Kan corr report ngaithla ang.

(Lalsangpuii Khawzawl PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNON CABINET

Union Cabinet chuan cheng vaibelchhe nuai 1 sing 2 leh 500 senna tur Semicon 2.0 a pawm. Union I&B Minister Ashwini Vaishnaw sawidanin he hmalakna hi ramchhunga semiconductor ruahman leh siamchhuah kawnga nawrkaltu pawimawh tak a ni dawn a. Semicon 1.0 lo kalpui tawh chu a aia liana siam a, khawvel semiconductor map a India pholang tur khawp anih thu a sawi a ni.

(Newsonair)

<><><>

FIFA WC 26

FIFA World Cup 2026 Semifinal inkhelah nizan khan Argentina chuan 2-1 in England hneh. Inkhel hmuhnawm takah England chuan inkhelh chawhnu lam minute 55 ah Anthony Gordon hmangin goal hmahruai an thun a. Argentina hian minute 85 ah Enzo Fernandez hmangin an sut a. Hemi hnu hian hun pekbelh minute 92 naah Lautaro Martinez chuan chakna goal a thun a ni. World Cup Final hi Pathianni zan dar 12.30 ah khelh a ni ang a. Spain leh Argentina te an intum dawn a ni.

(Newsonair)

<><><>